

四
明
清
詩
略
續
稿

馮
升



四明清詩略續稿卷六

李景祥

初名嘉照字書雲一字炳甫鄞人光緒甲午舉人乙未進士官奉天廣甯知縣著有愛日廬詩鈔

黃家來撰傳略君幼承庭訓以能文稱家貧授徒養親贈公晴芝先生惠略血手足痿痺扶持不少懈年五十四始登鄉薦連捷成進士授廣甯知縣甫下車卽繕城郭修溝道裁陋規懲健訟清積案數十起分俸課士以品學相勸勉有李烈婦者翁逼汙之不從殉節君廉得實按律懲治而詳請旌表如例闔邑頌之大吏器君奏補承德京縣庚子夏委署義州未赴以津沽釁起檄留本任未幾義和團匪結隊來縣毀教堂與教民爲難君力予禁止獲其頭目程顯庭等八人置之法其年八月遼瀋失守馬賊竊發內外騷然縣額兵故少且多調入省中君乃集縣人爲團練募丁壯數百晝夜巡緝方團匪之與旗營構難也邑中訛言俄兵將臨境吏民紛紛奔竄君從容書遺囑付家誓以死守出巡則以此意諭民民心始安俄人亦由錦州去卒無所擾次年俄兵忽集城下君單騎詣敵營開誠曉諭俄員釋然奸民有嗾洋兵肆擾者立斬之賊渠金壽山乘城內兵虛率黨數百突入君諭以禍福俯首就撫而餘賊若趙壁若范廣銓等先後攻城皆受創以去境內肅清壬寅二月有六合拳復起之謠法教士嗾俄員帶兵搜查幾激變君力爭其妄外人知其平日治行深信之遂止敘功擢同知以積勞致疾癸卯正月卒於官大府臚陳政績請照軍營積勞病故例賜卹並宣付國史館立傳有詔報可廣甯士民旣立碑頌遺愛且建祠尸祝焉

奉札至懷仁縣混江口辦捐冒雪前進宿旅店作

出門忽飛霰驅車命前征轉瞬隔城市飈疾無驚塵淅瀝漸收
響意者天已晴褰簾試一望四山連玉城冷氣逼毛髮重裘御
若輕始悟前進時車蓋積已盈所以光皚皚見色不聞聲晚來
勢加大坑塹一爲平無復辨車道遙指前村行遇店謀止宿解
裝日就暝壓寒急呼酒薄醞聊自傾擁被不成眠約略問前程
大小有四嶺後先相縱橫或曲而修阻或危而崢嶸曲若龍蛇
蟠危若虎豹撐乍聞令人怖繼思尙何驚豈無九折坂叱馭英
風生旣奉簡書出險塗亦夷庚且睡姑勿論早發俟天明回視
僕夫輩齟齬聲作雷鳴

由二道嶺過三道嶺

天明促就道騎卒導而先

護勇一名徐大令
芾棠令作前導

兩驛引一車儼若

扼中權僕馬殿其後首尾頗相聯是日雪尤甚須臾滿鞍韉馬

毛拳且縮驪足堅冰連一步一顛頓輪膠轍不前勉行二十里
入山益迤邐車從石罅過有若蟻孔穿磴道互環抱還作馬磨
旋如是兩三匝云已造其巔過此漸平坦輿夫奮著鞭出險徼
倖生情忽隨境遷謂茲陂陀耳乃以修阻傳何怪巴蜀道難擬
上青天隔嶺試探險視此或倍焉努力能猛進星辰高可攀惜
哉冬日短樹杪上炊煙加意事芻秣來朝駕輜輶

過大嶺

一名普陀迦嶺

且喜雪新霽矐矐明初日凍合質未堅輪破勢彌疾林麓開平
坡昂首恣奔駢坎窞不暇顧馬足忽前失蹄陷輪就傾臥地任
鞭扶用效將伯呼久久掀而出始歎眉睫近事變難窮詰厯險
不知懼宜其遭顛蹶而況前嶺高伊豈兩馬力疾行無善步何
如早休歇主人意良厚爲我謀一一急呼里正來借乘備驂勒
憑誰作鄉導導以抱關卒辨色卽前進脂膏重塗牽愈進乃愈

危升墜爭毫忽升如石轉崖墜如箭離筈譬彼逆水舟脫手愁
淪沒力挽馬頭行良久排雲闌下山或較易險阻殊曩轍爰命
役夫返好言相撫卹豈知巖下路初境頗蘄絕一發恐難收迅
同奔電掣假焉值危崖詎復有完質所幸尋丈外磴道多盤屈
鳴鐸來牛車康莊知漸達今日則已矣遙望增怫鬱

踰石頭蘭陂嶺至裏垵溝

怫鬱奈爾何車從冰上過約略見狐迹凍合紛渡河路隨雙轂
轉迅疾如拋梭散處成村落所居茅屋多驚鳥見人飛取次入
山阿危峯對面立誰將峭壁摩是爲蘭陂嶺愁我勝普陀上下
各十里平分雲霧窩近邊與絕塞劃界無偏頗欲進馬不前厲
聲徒叱呵朽株迭爲難常與輪鐵磨開旣無力士負亦無夸娥
嗟茲行役苦悔不老澗藹登高忽開面磴曲盤髻螺繞山蟻附
下拂蓋飄長蘿殘雪挂樹枝皎如玉色瑳停車覽風景叉手發

吟哦過此豈無險萬象前已羅俯視皆培塿斯言良匪訛惜乎
道不治動輒阻逶迤爲語守土者伐山宜假柯繼恐思越畔攻
盾肆矛戈吾但事吾事橫征懲虎苛若問行路難請聽賤子歌

題王脩廬秋林聽瀑圖小影

圖貌非與性俱傳摹寫羣屐空翩躚紀遊於我無增益五嶽羅
胸皆陳迹今覽斯圖生面開隻身獨向危橋來欲定腳跟先鍊
膽洗將俗耳聽晴雷其閒兩山拔地立泉經岫束奔逾急與石
爭道舒成川俯瞰恐起蛇龍蟄而君落落偏好奇不與目謀與
耳期聞根悟澈一夷險此景非復人所知不然宦海多遷變中
無定守苦驚眩一朝風波驀地生立足最易隨流轉乃復安常
屹不動磨蝎退宮拜殊寵堅忍都由閱歷成豈徒官以才名重

蓋州道上

出郭無多里遙瞻海角通數家鹽戶列三面野廬空地鹵壤皆

白霜酣草盡紅雜糧如許種開墾利何窮

春日過保安寺訪慧上人

莫問東丹址

盛京通志遼東丹王故宮在城內西北隅遺址尚存今并其址無可考矣

還留西庫名

相傳寺址即遼宮西庫故有是名

山看依萬紫

萬紫山正當城之西北疑即遼宮舊地

石許證三

生

寺傍山麓石根每多破土而出

夜洗金銀氣春含草木情老僧堪共話披衲

早前迎

謁全溝山上武廟謹題

巍峨廟貌鎮江干俯視高麗拱若翰歷代皇圖恢一統去年兵
禍始三韓寇邊路熟鴟張易寄籍民多鳩集難但乞神靈默呵
護題楹字句敢云安

初涖廣甯縣任望城懷古有作

鹿走龍興視此城彈丸雖小係非輕得機直奪閭陽隘失勢全
空河上營養寇况遺亡國患無君合主入關盟近來強敵多窺

伺安不忘危在練兵

至錦州府過大凌河弔前明熊經略

主扼巖疆撤散營旁撓無奈舌燒城尙書閹弱輕言戰巡撫驕
愍不習兵六萬蕩平成底事三方節制擁虛名所嗟一走落人
口空向河流作憤聲

閨怨

江干送別幾經秋每遇良宵怕倚樓我欲飛身攔明月莫將圓
鏡照離愁

李翊勳

字企堯鄭人光緒甲午舉人

田家雜興

游目四郊外村居合雲樹父老攜幼來草服安吾素富貴非所
願躬耕急農務春雨一犁足秧苗插無數牧笛起遠村蓑笠雜
煙霧望歲都有情榆杏悅瞻顧載柞還載芟饁餉來婦孺鄰叟

四明清言明經集 卷六
乘興過相與話野趣

時光倏已轉扶疏樹繞屋負鋤出郊原但聞齊叱犢瓜棚氣清
和麥隴香馥郁聲聲田歌起時與和一曲應候勤耘耔平疇慶
霑足歸來日已暮晚飯飽蔬菽蔽戶多桑麻壓檐皆松竹出作
復入息自忘年華速

涼風轉瞬至臨水稻花香圍坐偕一家欣然祝倉箱寒煙綻玉
粒黃雲壓金穰及時納禾稼刈穫自主張恻恻聞隔隴栗栗堆
斜陽租無縣吏催蓄積有餘糧耒耜倚古壁桔槔挂鄰牆田功
一年畢其樂殊未央

野景忽蕭條落葉飄牖戶田居隔塵囂蕭然此環堵柴門傍水
開茅屋牽蘿補霽色暖初烘納日約鄰父犬吠迎客來殺雞復
爲黍把酒話桑麻兒女亦團聚朝市久無心衣冠敦古處娛茲
歲晚閒迅速歎時序

童重佑

字引臣鄞人華孫
光緒甲午舉人

暮春卽事集蘭亭字 錄二

觀化情能喻斯遊及暮春地幽生竹趣室靜晤蘭因流水懷今
日清風感故人此閒嘗坐詠無取管絃陳
一生欣自得萬事聽天然仰契清和品終殊時世賢林亭知靜
趣絲竹感流年朗抱能稽古相期固與遷

袁本喬

初名梯雲字登青號警魯鄞
人亮年從子光緒甲午舉人

畫丸

家傳略君自幼恂謹無子弟過九歲能屬文稍長端莊淵
默言笑不苟性仁厚遇戚族有恩紀所著有澹川詩存

詠月湖十洲

錄二

風光宜雨又宜煙省識春歸柳上先絲裊半隄瓜蔓水陰分一
角蔚藍天畫橋飛絮吟詩舫驛路新枝送別筵館啓涵虛陳迹
在湖濱凝望倍殷然

柳汀

芳洲一帶盡爛斑錦繡初堆水半灣不信秋容遲暮候偏疑春

色淺深閒溼紅淨影寒波洗豔粉明妝夕照殷采采湖頭何處
客酒邊端合映酡顏

芙蓉洲

新綠

山齋鎮日影沈沈隙地三弓盡綠陰香霧晨霏僮賁茗澹雲晝
護客眠琴芭蕉涼逼紗窗暗蘿薜濃遮繡幕深祇此幽懷清入
畫底須摩詰筆端尋

胡振濤

字壽水鎮海人振濤
弟光緒甲午舉人

松棚

一架清陰覆鹿場松棚高築倚斜陽老翁掃石尋秋夢穉子分
瓜買晚涼龍氣噓寒濃欲雨麝風吹冷暗飛香夜深更喜琴牀
月來照玲瓏四面光

蛟川竹枝詞

錄二

麥魚始出纔分麥梅蛤初肥正熟梅待到秋深霞浦口海潮又

送望潮來

麥魚梅蛤望潮均水產名

桂花蒸暖暗香霏八月黃魚上水飛

仲秋捕黃魚曰桂花黃魚

最喜新霜天

氣好菠蔕

菜初嫩蟹螯肥

張美翊

字讓三號簡碩晚號蹇叟鄞人光緒甲午副貢徵舉經濟特科直隸候補直隸州知州著有綠猗閣詩集

馮開撰行述略君學於母舅劉藝蘭先生潛心證彙積久勿勸督學善化瞿公兵備無錫薛公目為偉器薛公奉使歐洲君隨行留心考察成土耳其志等書都十餘種歸後壹以名器象數之學倡率後進武進盛公聞君名聘授賓職南皮張公祥符馮公先後延主幕府事君為學不主故常少年治詞章中年主經世晚年惻於士大夫夸狃域外國學寢廢益反本推究故籍遺文墜獻極意搜錄嘗謀刻四明先哲遺書以資力未逮時時引為憾數年六十八卒

小集上海桃源隱酒樓益陽胡定臣兄弟出示陶文毅公

印心石屋圖瓷器上繪金陵蜀岡滄浪亭風景並題小

詩蓋道光丁酉所製胡君文忠公之孫文毅公之彌孫

也感賦長歌即和西巖老漁超社陶字韻

益陽宮保人中豪婦翁冰玉安化陶文孫繩武述祖德感念家

國辭京曹竭來海上意不適有如澤畔吟離騷傭保雜作坐酒
肆高樓矗起臨江皋時人莫問今何世武陵自種仙源桃出示
古瓷並精美製作突過哥定窯印心石屋天章燦有圖有詩工
摹描當時道光歲丁酉開府江左論鹽漕公餘會集絕風雅羅
列酒器供行庖厥後東南大亂起胡公戡定尤勤勞朝暮運甓
有師法中興將相天建標滄桑倏爾驚世變爲庶清門誠孤高
譬之桓公在晉代後有靖節恥折腰可知仕隱關運會千古一
轍隨所遭況乃大盜屢移國江南景象殊蕭條燕京法物已散
落留此區區亦無聊西巖老漁今山斗吟詩結社何超超摩挲
祕色發高唱俛仰身世思前朝諸公自是古彝鼎賤子無用同
陶匏賦詩還器且什襲會有寶氣騰雲霄

谿上費瑯卿廣文小滄桑館落成爲賦長歌

君家費長房賣藥懸一壺我家張果老載酒騎一驢已見滄海

漸清淺變作桑田真須臾仙山樓閣渺何許一彈指頃歸空虛
人生百年祇如此幕天席地皆蘧廬高門甲第極輪奐鐘鳴漏
盡俄邛墟獻子成室發歌哭張老頌禱胡爲乎不如東坡數閒
屋舊巢新掃宜居諸谿上青山來一抹芒屨竹杖思髯蘇見君
書榜感世變索我詩篇嚴追逋今年重陽無風雨投閒習懶聊
自娛門可張羅室懸磬幸無敗興來催租我爲題句君置酒撫
松采菊相歌呼君不見桃源記武陵漁魏晉論世今何如寓言
雖異境不異好補柴桑入畫圖

送章生梅先自南昌回諸暨

此去零丁甚臨歧爲子嗟呼天方喪父歸里又無家寥廓鳴孤
雁橫流泛斷槎越東苦秋潦何處避蛟蛇
汝父循良選清廉著贛中半生殊落落一訣太恩恩繼志毋爲
吏勤生要力農淒涼慈母線寸草待春融

讀漁洋秋柳詩釋感賦

并序

先生菜根堂詩集序順治丁酉予客濟南諸名士雲集
明湖一日會飲水面亭亭下楊柳千餘株披拂水際葉
始微黃乍染秋色若有搖落之態予悵然有感賦詩四
章淄川高在午大令丙謀釋曰先生秋柳之詠蓋爲鄭
妥孃作妥孃福王府歌妓隨至南都亂後流落濟南每
於酒筵客座談及舊事適漁洋會諸名士於水面亭因
爲賦秋柳詩蓋別有感觸詩中江南白門指宏光南朝
洛陽梁園指河南福藩否則明湖會集起興白下不知
所指矣此說本之濟南朱曉村朱故新城王氏外孫藏
有秋柳亭圖中畫一女子謂卽妥孃云妥孃名如英能
詩見牧齋列朝詩選閨集乃孔東塘桃花扇院本奚落
妥孃殊失事實因據詩釋表白之

鞠部班頭記小名縷衣垂白不勝情西風往事懷梁苑南渡新
聲憶帝京弱絮飄零今老大長條披拂尙輕盈相逢莫問前朝
事回首章臺百感生

浩劫雄藩續夢梁小朝廷又閱滄桑今看衰柳搖湖水舊是名
花種洛陽歌舞未終人已散風流垂盡國先亡平生頗恨桃花
扇奚落能詩鄭妥孃

殘臘病中喜見君木慰明存詩次韻奉和

酒未新篋菜待醺荒荒寒日漏疏檐不知漢臘年來改但覺秦
灰劫後添避世偏於賢者近離羣終爲俗人嫌繩牀老病頽唐
甚夢幻無端豈久淹

壯歲浮槎海外行當年氣象獨崢嶸平時權略消磨盡易代心
情感慨生喜有文章論法派愧無詩句撼長城我如病葉君孤
幹風雪天寒尙作聲

公阜出示頗黎版印唐太宗溫泉銘俞仲還考廉考之詳
矣爲題兩絕

晉祠碑與溫泉刻貞觀當年兩御書喜有銘詞留石室從知絳
帖是殘餘

庚子妖民禍畿輔同時寶墨發敦煌米家書法尋來歷始信淵
原合晉唐

胡同鈞

一名振良字時良號洲蓀鎮海人光緒甲午副貢著有友竹山房詩草

蛟川者舊詩補洲蓀精醫理兼通星命之學家居萬山中雖未嘗刻意爲詩而吟風弄月頗有自得之致

雨後登樓

雨後登樓望千山黛色濃泉圍門浦宅雲鎖箬雷峯綠意添庭
草涼風動壑松夕陽流水外膏澤慰三農

同張子謀登靈峯寺

突兀雲峯天與齊靈巖果否葛仙棲錯行松徑惹人笑小住茅